

CAft: “Siguiendo cu reformanan, ta tene cuidu pagabel”

Desde 2023, Aruba ta realisando surplusnan, y anualmente e pais ta amortizando debe. Hunto cu e crecimiento economico, esaki ta pone cu e ratio di debe ta baha rapidamente. Na mes momento, e fundeshi ainda ta vulnerable: e gastonan di interes ta keda sumamente alto y debi na e envehecimento di poblacion den futuro e gastonan di cuidu lo forma un parti tur biaha mas grandi di e presupuesto.

Ademas, CAft ta señala riesgonan respecto di e hospital. Reformanan ta keda necesario pa salvaguardia sostenibilidad di finanzas gubernamental.

Cuidu na prueba di futuro CAft ta constata cu riba algun area di cuidu, Aruba ta muestra desaroyonan positivo. Por ehemplo, a reduci e ratio di cuidu di 8,7 porciento di e producto nacional bruto (bbp) na 2023. Control di e gastonan di cuidu si ta keda importante considerando e hecho cu poblacion lo sigui enbehece. Den e marco aki, ta positivo cu AZV ta trahando riba e adopcion di un perspectiva riba termino largo y e aplicacion di un marco di gastonan multianual como instrumento di control.

Aruba ta implementa reformanan manera a ser inclui den e acuerdo di cuidu. Den e contexto aki, e enfasis ta riba alivio di cuidu hospitalario fortaleciendo e funcion di gatekeeper di dokternan di cas, y promocion di prevencion. Na mes momento, mester di maneho pa acomoda e demanda creciente pa cuidu a largo plaso. Actualmente, e gastonan pa cuidu di hende grandi ainda ta limita, pero debi na e envehecimento di poblacion, lo tin tur biaha mas demanda di cuidu. P'esey, ta necesario pa haci escogencianan desde awor cu ta yuda tene cuidu pagabel y na prueba di futuro.

Den combersacionnan cu varios partido, a menciona e deficiencianan den e edificio di hospital. Si no haya solucion, tin riesgo cu cuidu ta keda perhudica. Considerando e funcion di cuidu vital, ta importante pa tur partido asumi nan responsabilidad, y yega na un enfoque conhuntito tocante di e asunto aki mas pronto posibel.

Drecha e fundeshi



A pesar cu desde 2023, Aruba ta realisando surplusnan y e ratio di debe ta baha rapidamente, e gastonan di interes ainda ta pisa hopi; actualmente, 16 porciento di e presupuesto ta dedica na interes. P'esey, reduccion di debe ta keda esencial, y ademas ta crea espacio den e presupuesto pa reformanan den cuidu. Den e marco aki, CAft ta hala atencion riba e exceso di mas cu AWG 500 mion cerca AZV y Sociale Verzekeringsbank cu por emplea (parcialmente) pa amortizacion di debe, teniendo na cuenta e obligacion legal pa tene un reserva.

Banda di esaki, CAft ta muestra riba e importancia di supervision y maneho mas estricto di entidadnan gubernamental. Den e marco aki, elaboracion di un politica di participacionnan y dividendo

ta un precondition. Ademas, implementacion rapido di bon corporate governance ta esencial.

Bishita na hospital
Recientemente College Aruba Financieel Toezicht (CAft) a haci un bishita na Horacio Oduber Hospital (HOH). Y e biaha aki a dialogo especificamente tabata riba e tema di cuidu y e futuro di nos hospital.

“E biaha aki nos ta di bishita pa toca e tema di cuidu y naturalmente hospital ta un parti hopi importante den esaki,” segun Lidewijde Ongerling, presidente di CAft, cita den un comunicado di hospital HOH. El a papia cu hopi aprecio riba e entrega di e empleado: “Mi a haya un imagen hopi bunita y alabes impresionante di e dedica-

cion cu tin pa loke ta brinda calidad di cuidu na e pashentnan. Y esaki, sigur mirando e circunstancianan cu no semper ta asina facil.”

HOH tabata durante e bishita aki bon representa pa presidente di Hunta di Directiva, Jacco Vroegop, hunto cu e dos miembronan di directiva, esta Gregory Croeze y tambe Yuri Casseres. Ademas, tabatin tambe coleganan presente di diferente departamento cu a comparti nan experiencia y bista riba e practica diario y e retonan cu hospital ta enfrenta.

Jacco Vroegop a agrega: “Awe nos a pone un gran enfoke riba e retonan cu e construccion a y ta trece cune. Esaki ta un proyecto cu ta yegando su final, pero ainda tin algun cuestionnan financiero pa so-

lucionar. Nos a enfatisa cu ta hopi importante pa yega na un solucion, pa finalmente tin un edificio cu no solamente ta bunita di pafo, pero tambe ta safe y alabes mas importante ainda un luga cu ta haci posibel pa por brinda cuidu di calidad.”

Banda di e tema di construccion, tambe a papia di forma amplio riba e di cooperacion cu diferente partner na Aruba y tambe den region y tambe a toca e tema di cuidu cu ta brinda na esnan indocumenta. “Den nos vision tur hende mester ricibi e mesun cuidu di calidad, pero e ta trece cune retonan financiero,” segun Vroegop.

CAFT a indica cu Aruba, specialmente den e sector di cuidu, ta haciendo un bon trabou compara cu e otro islanan. Esaki sigur a yena hunta di directiva cu orguyo. Vroegop a enfatisa: “Lo mas importante cu por saca for di e reunion aki ta cu nos mester realisa huntu cu cuidu nunca ta stop, y cu hospital mes ainda ta leu di termina. Y cu hunto nos mester inverti mas pa pone nos hospital riba nivel, pa asina por brinda e cuidu cu comunidad ta desea y ta spera di nos, y cu alabes e cuidu por ta bon paso nos tin un edificio safe.”

E dialogonan cu CAFT ta forma un paso importante den e direccion corecto: “Mi ta sinti cu nos a logra transmiti e mensahe desea, y cu esaki lo por wordo hiba siguiyente pa Minister di salubridad y tambe Minister-President di Aruba. Mi tin e speransa cu e proceso ta bay sigui cana e caminda necesario pa hunto nos por ta satisfecho di e dia di awe, pero alabes tambe orguyoso di nos futuro!”

